

Morning Dogri (NSD) National News Bulletin 18-05-2024

आकाशवाणी

1. लोकसभा दे 5में गेड़ दे चुनां लेई प्रचार अज्ज थमां मुक्की जाग। प्रमुख राजनैतिक दलें दे नेता चुनां प्रचार च जुटे दे न।
2. प्रधानमंत्री ते बीजेपी दे वरिष्ठ नेता नरेन्द्र मोदी होर अज्ज अम्बाला, सोनीपत ते दिल्ली च रैलियां करगंन। कांग्रेस नेता राहुल गांधी उत्तर प्रदेश ते दिल्ली च प्रचार करगंन।
3. इजराइली फौज नै रातीं'लै कीती गेदी कारवाई दरान गजा थमां 3 कैदिएं दे शव बरामद कीते न।
4. मौसम विभाग नै देसै दे उत्तर-पच्छमी, मध्य ते पूर्वी हिस्सें च बड़ी जबरदस्त गर्मी दी शैका जताई ऐ।
5. बैंकाक च थाईलैंड ओपन बैडमिंटन प्रतियोगिता च अज्ज मर्दे ते महिलाएं दे डबल्स दे सैमीफाइनल च भारती खडारी चुनौती पेश करगंन।

<><><><><><>

5th Phase

लोकसभा दे 5में गेड़ दे चुनां लेई प्रचार अज्ज थमां मुक्का करदा ऐ। इस गेड़ तैहत उत्तर प्रदेश दिएं 14, महाराष्ट्र दिएं 13, पच्छिम बंगाल दिएं 7, बिहार ते ओडिशा दिएं 5-5, झारखंड दिएं 3 ते केन्द्र शासत प्रदेश जम्मू कश्मीर ते लद्दाख दिएं 1-1 सीटें लेई औंदी 20 मई गी वोट पाए जांगन। लोकसभा दे बाकी दे गेड़ें दे चुनां लेई प्रचार जोरें-शोरें जारी ऐ। बक्ख-बक्ख राजनैतिक दलें दे बड्डे नेता देसै दे बक्ख-बक्ख हिस्सें च रैलियां ते रोड शो करै करदे न।

<><><><><><>

Rallies Hariyana

प्रधानमंत्री नरेन्द्र मोदी होर अज्ज हरियाणा च बीजेपी मेदवार आस्तै 2 रैलिएं गी संबोधत करगंन। अम्बाला च दपैहरी मगरा पौने 3 बजे ते गोहाना सोनीपत च पौने 5 बजे प्रधानमंत्री

होर रैलिएं गी संबोधत करगंन। अम्बाला ते सोनीपत च उंदे दौरे गी दिखदे होई धारा 144 लाई गई ऐ ते सुरक्षा मजबूत कीती गई ऐ। अम्बाला थमां साबका केन्द्री मंत्री रतन लाल कटारिया हुंदी घरै आली श्रीमती बंतो कटारिया ते सोनीपत थमां मोहन लाल बड़ोलो, बीजेपी दे मेदवार न। हरियाणा च 25 मई गी मतदान होना ऐ। तोआई देश दी राजधानी दिल्ली च अज्ज चुनां प्रचार तेजी पकड़ोग, जिसलै बीजेपी दे वरिष्ठ नेता ते ते प्रधानमंत्री नरेन्द्र मोदी ते कांग्रेस नेता राहुल गांधी होर अज्ज अपना अपना चुनां अभियान शुरू करा'रदे न। दिल्ली च मतदान 7 दिन रेई गेदे न। प्रधानमंत्री मोदी होर उत्तर पूर्वी दिल्ली च बीजेपी मेदवार मनोज तिवारी हुंदे लेई जनसभा गी संबोधत करगंन जदके राहुल गांधी होर रामलीला मैदान अशोक बिहार च जनसभा लाइयै कांग्रेस मेदवार जय प्रकाश अग्रवाल हुंदे आस्तै प्रचार करगंन। दिल्ली दे मुख्मन्त्री अरविंद केजरीवाल होर पच्छमी दिल्ली संसदीय क्षेत्र दे अपने मेदवार महावत मिश्रा हुंदी रैली च शामिल होंगन। दिल्ली च 25 मई गी, सब्बनें 7 हल्के च मतदान होना ऐ।

<><><><><><>

PM-Mumbai Rally

प्रधानमंत्री नरेन्द्र मोदी होरें आम चुनां च रिकार्ड गिनतरी च सीटां जित्तने दा विश्वास प्रगट कीता ऐ। मुंबई च कल एनडीए दी इक चुनां रैली गी संबोधत करदे होई उनें आखेआ जे भारत गी 2047 तक्कर विकसित देश बनाने लेई ओह पूरा दिन ते हर दिन लगातार कम्में च लग्गे दे न। उंदी प्राथमिकता आम लोकें दे जीवन गी सखल्ला बनाना ऐ। प्रधानमंत्री होरें जनता गी आह्वान कीता जे ओह मती कोला मती गिनतरी च आइयै अपने बच्चें दे शानदार भविक्ख, शांति ते सुरक्षा लेई वोट पान। मुंबई गी सुखने साकार करने आला शैहर आखदे होइ उनें वायदा कीता जे मुंबई गी ओहदा बनदा हक्क दित्ता जाग। उनें आखेआ जे भारत कन्ने स्वतंत्र होने आले केई देश साढ़े शा अग्गे लंघी गे, पर पिछली सरकारें कदें बी भारत वासिएं दी शक्ति च जकीन नेई कीता। उनें दावा कीता जे स्वतंत्रता हासल होने पर महात्मा गांधी हुंदी सलाह परजेकर कांग्रेस गी खत्म करी दित्ता गेदा हुंदा, तां अज्ज देश 50 साल अग्गे होना हा।

<><><><><><>

Israel Army

इजराइल दी फौज नै गाजा थमां 3 कैदिएं दे शव बरामद कीते न। इजराइली रक्षा बल आईडीएफ नै आखेआ ऐ जे एह शव अमित बुचकिला, शनि लौक ते इत्जाक गेलेरेंटर दे न। आईडीएफ मूजब पिछले ब'रे 7 अक्तूबर गी उंदी हत्तेआ करी दित्ती गई ही। इजराइली रक्षा बल नै आखेआ जे रात भर चले दे अभियान च एह सब बरामद कीते गे न। इजराइल दे प्रधानमंत्री बेंजामिन नेतन्याहू होरें इस खबर गी बड़ी दुखद करार दित्ता। हमास दे बंदूकदारिएं पिछले ब'रे 7 अक्तूबर गी इजराइल च दाखल होइयै इक बड्डा हमला कीता हा जेहदे च उनें तकरीबन 1 ज्हार 200 लोकें दी हत्तेआ करी दित्ती ही। ओह 252 लोकें गी बंधी बनाइयै गाजा लेई गे हे। हमास दे हमले दे बाद इजराइल नै गाजा च आक्रामक हमला कीता जेहदे च उनें 35 ज्हार शा मते आतंकवादिएं गी मारने दा दावा कीता।

<><><><><><>

DOT Discussion

देश दे टिकाऊ विकास आस्तै सब्बने सप्लाई चैनें अर्थबवस्थाएं च समाजी सेक्टरें च प्रौद्योगिकी दा इस्तेमाल करना जरूरी ऐ। एह गल्ल दूर-संचार सचिव डॉ. नीरज मिततल होरें कल नमीं दिल्ली च विश्व हदसंचार ते सूचना समिति दिवस पर इक गोलमेज वार्ता गी संबोधत करदे'लै आखी। उनें इब्बी आखेआ जे भारत दी डिजीटल अर्थबवस्था 2025, 26 तक्कर डेढ़ अरब डॉलर दी होइ जाग जेहड़ा साढ़ी जीडीपी दा 15 फीसद होग। इस वार्ता च जेहदा वियम हा आर्टिफिशल इंटैलीजेंस राएं टिकाऊ डिजीटल विकास 30 शा बद्ध उद्योगी जगत दे लीडरें हिस्सा लैता।

<><><><><><>

Weather

मौसम विभाग नै अगले किश दिनें च देसै दे उत्तर-पच्छमी, मध्य ते पूर्वी हिस्सें च बड़ी मती गर्मी दी शँका जताई ऐ। विभाग नै आखेआ ऐ जे राजस्थान, पंजाब, हरियाणा ते दिल्ली च औंदे मंगलवारे तोड़ी बड़ी जबरदस्त गर्मी दा प्रकोप जारी रौहने दा अनुमान ऐ। मौसम विभाग नै आखेआ जे गर्म हवा आले हालात कल थमां देसै दे पूर्वी ते मध्य हिस्से च शुरू होग। इस म्हीने दी 23 तरीक तगर भारत दे दक्खनी हिस्से च लगातार रूकी-रूकियै भारी बरखा होने दी मेद ऐ। मौसम विभाग नै आखेआ जे मंगलवार तोड़ी तमिलनाडू, पुदेचेरी,

कराइकल, केरल, माही तटीय आंध्रप्रदेश, रायलासीमा ते कर्नाटक च रूकी-रूकियै मोलेधार बरखें दी पेशनगोई कीती। भारतीय मौसम विभाग मताबक इस म्हीने दी 20 ते 21 तरीक गी केरल च रूकी-रूकियै मती गैमोलेधार बरखा दी मेद ऐ। पूर्वी भारत च सोमवार तोड़ी अरुणाचल प्रदेश, सिक्किम, असाम, नागालैंड, मणिपुर ते मेघालय च रूकी-रूकियै मती बरखा होने दी मेद ऐ। अगले त्रऊं-चऊं दिनें लेई उत्तर-पच्छम, मध्य ते पूर्वी भारत दे केई हिस्सें च आस्ता-आस्ता, बद्धोबद्ध तापमान च 2 शा 4 डिग्री सैल्सियस दा बाद्धा होने दी मेद ऐ। दिल्ली च अज्ज शमान साफ रौहग ते बद्धोबद्ध तापमान 44 डिग्री सैल्सियस तगर रौहने दा अंदाजा ऐ।

<><><><><><>

Badminton

बैंकाक दे थाईलैंड ओपन बैडमिंटन प्रतियोगिता च अज्ज मर्दे दे डबल्स दे सैमीफाइनल च भारत दे चिराग शेट्टी जे सातिवक साई रंकी रेड्डी दी जोड़ी दा मकाबला कोरिया दी मिंग चे लू ते तांग काई बेई दी जोड़ी कन्नै होग। भारती जोड़ी नै क्वार्टर फाइनल च मलेशिया दे जुनैदी आरिफ ते रॉय किंग याप दी जोड़ी गी हराया हा। महिला डबल्स दे सैमीफाइनल च अज्ज गै भारत दी अश्विनी पोनप्पा ते तनीशा क्रास्टो दी जोड़ी थाईलैंड दी जॉंगकोलफान किटीथराकुल ते रविंडा प्राजॉंगजई दी जोड़ी कन्ने खेडोग। मर्दे दे सिंगल्स दे क्वार्टर फाइनल च दुनिया दे 8में नंबरे दे खडारी कुनलाबुत विविदर्शन ने मिराबा लुआंग मईसनाम गी 21-12, 21-5 कन्नै हराया। एह प्रतियोगिता कल संपन्न होई जाग।

<><><><><><>